

UN FIL DE PAJA

Spia, la note,
dedrio
un sbacio de stele:

na luce fiapa
se perde
in mezo a case scure
fra nastri d'argento
de strade
che se ingropa
al crocevia de l'anima.

E la tera, sfinia,
in zenocio, la speta.

A mane giunte,
a testa bassa,
la speta...
de védar
postarse ancora
sora un fil de paja
un buto de speranza.

Nadia Zanini (Bovolone-VR)

NOVEMBRE 2010

Vuria caessarte
co afeto e gentilessa
cara la me Vicensa.
Te si stà tanto feria
ne la to belessa,
ne la to dignità,
da sta brentana
che de colpo te ga sporcà.
E co ti anca noaltri
sentimo sporcà, onfegà
la nostra "vicentinità".
Le nostre làgrime no bastarà
a far tornare a slusegare
tuta la to beltà.

**Pasqualina Galvanin
(Vicenza)**

INCANTESIMI

Butè 'e caene ai rovi!
Supiè, su sti caivi!
Sonè canpane a festa
sparpagnando rento 'a vae
paròe de ceo!
tanto che mi,
nel dì più beo,
invasà da na letissia
che me fornisse de ae
possa trasmigrare ne l'età
de l'infanzia
quando che, par star ben,
me bastava:
incantesimi de mama che,
in quea sera benedeta,
me cunava
contàndome sotovosse
- come in segreto -
'na storia de mistero...
dita co' emossion:
evento vero,
de Amor Universale...

Jera 'a fantastica storia
del Santo Nadàe.

**Amalia Motta
(S. Giuseppe di Cassola-VI)**

DAVANTI AL PRESEPIO

Me piasaréa tanto vedérte,
o picolo Gesù fiol de Dio,
con coalche ano de pi,
con le ganassete rosse
e scoltarte fin che te ghe parli
ai grandi e piccoli de 'sta tera
e sentirte dighe a 'sti òmeni:
"No' stè voler tuto e subito,
no' stè voler anca 'l pan de i altri,
no' stè somenar nel mondo
la zizania, la nasse za da sola.
Contenteve del belo
che ve compagna,
serchè 'l giusto par tuti,
mostreve coanto l'è belo 'l soriso.
Le parole mie, coele del Vangelo
metile sempre davanti a tute,
se fè cossi ve ridarà i ani
con le so stagioni
e la vita con i so alti e bassi."

Luigi Ederle (Grezzana-VR)

NADALE

Apena sbrissà dedrio on troso
i Re Magi me dimanda se la luna
la pol farghe strada a na bétola
dove se ga mucia on fià de mondo
e se in celo ghe sarà nove orassion.

I me ga mostra on libro
co le pagine bianche
e on spigasso de coanta strada i ga fato
par védare on putèo
e se 'l sarà lu la salvessa del mondo
prima de n'altra Babele.

"A serchemo - i me supiava so 'l muso -
na musica che la possa entrare nel core
e pi 'ndrìo ghe xe i pastori
e volemo métare ne le borse
'l soriso de sto putèo."

El silensio del celo
e la vosse de on torente
muciarà le storie pa on diman
ca tuti se possa trovarse tacà
e spartire ste coatro strasse.

Ma par la verità
mi me so' dimanda:
"Xe tanto lontan sto Nadale?"

Fernando Boaretto (Ponte S. Nicolò-PD)

BANBIN GESÙ

Vien vien
Caro Putin
'Ncora 'na volta
In te 'sta tera
Stratolta
Da fame e carestie
Uragani e malatie
Da cativerie e miserie
Da persone poco serie
E da ogni sorta
De bestialità
Che l'omo
Se ga inventà
Pur ejarte
Ma che no 'l gavarà
Mai età to arte.

Giancarlo Fabbian (Monselice-PD)

S. NADÀE DE I RICORDI

I passàa de casa in casa
i cantori con le nenie de i pastori
anunciando el lieto evento,
i cantàa eà pastorèa e 'a ciara stea,
e 'a parona de casa co na feta de fugassa
e on'onbra de vin eà ringrassiàa
i òmani che i ghea cantà davanti
a eà porta de casa sua.

So 'l fogolaro brusàa on bel toco
de tàpara de pràtano tegnù
da parte pa eà note de Nadàe,
sentà vissin al fogo me popà
el ne contàa de quando el jera putèo,
mi no eó scoltavo, i me sogni i voeava
so chel veliero co 'e vee destira al vento
piturà su i piati
posà so eà cradensa de 'a cusina.

A mesanote el pi picoeo de 'a fameja
el tegnéa in man el Gesù Banbin
e lo faséa basare a tuti e dopo
lo metéa so 'l picoeo presepio
fato co do casete ricavà
da 'e scàtoe da scarpe co rento
do tochi de candéa,
eà capana fata co quatro tocheti de toea,
el teto cuerto co ea paja,
na brancà de fen
dove se metéa el Banbinèo.

**Anisetta Codogno (Zumaglia-BI)
in padovan de Casalserugo**

NADAL DE LUCE

Che fadiga caminar de note,
quando te resti solo come un can:
la paura l'è ormai la nostra dôte...
No se ga pi fiducia nel doman.

Che fadiga camminare al scuro,
quando gavemo el còre pien de rabia,
quando tratemo i altri a muso duro
con l'egoismo che ne sèra in gabia.

Caminare a l'orba l'è fadiga:
ne strupa i oci tanta ipocrisia
e con el dubio, che ormai ne liga,
ogni foresto volemo mandar ia...

Ma a l'improvviso ghè sbocia stanote
sogni despersi de pace e de bontà...
Slùsega i paesi con le case a mòte,
ogni strada sconta l'è inluminà.

L'è cargo el cièl de stele tremolanti:
nel nostro còr le va s-ciarando el scuro
e le s-ciantisa come i fulminanti
che del dolor i se sfrégoła sul muro.

Ciàcola festosa ogni campana
e ne le cese splende i lampadari...
De sora al cuerto de na capana
ghè Angeli che i sta impissando i ciari.

E ragi de fiducia e de speranza
se alsa in cièl e inlùmina la gente,
che colma oramai de esultansa,
la speta tuta unita finalmente

el Butin che ariva
e che spampina intorno
lampi de luce viva
che cambia el scuro in giorno.

**Giorgio Santi
(Belfiore-VR)**